

Declaracion di Junior Croes no a cay den bon tera den seno di MEP Partido MEP no ta pronkea cu plumanan di Betico!

ORANJESTAD – Partido MEP a manda un comunicado pa reacciona riba e declaracion cu sr. Junior Croes a haci durante e acto protocolario pa celebra Dia di Betico diaranson ultimo. E comunicado di partido MEP ta bisa textualmente asina: Henter comunidad por a tuma nota di e declaracion di un yiu di Betico Croes, den cual e yiu aki a trece padilanti cu 'MEP te ainda ta uza Betico, cu MEP mester stop di pronkea cu plumanan di Betico y cuminsa para riba su mes'. E declaracion aki siguramente no a cay den bon tera den seno di MEP, ya cu MEP ta e unico partido na Aruba cu semper a sali na vanguardia y defensa di nos Libertador Betico Croes. Kendenan mas cu no ta e yiunan di Betico cu a experencia con durante e periodo di Gabinete Eman (1994-2001) e gobierno di e tempo ey a trata di tur forma di lubida e gran personahe aki, a trata di desacredita tur su logronan, a laga skirbi buki

falsificando henter e lucha pa e logro di Status Aparte y te hasta a bin cu un propio 'Plaza 18 Maart' y p'asina ey riba nan celebra e dia di Himno y Bandera, esta e mesun simbolonan cu Betico Croes a introduci na 1976 y pa cual e partido AVP a vota contra esakinan. Nos tur por corda ainda con e tempo ey e yiunan a considera esaki como un bochoro pa nan kerido tata Betico Croes y cu nan a demonstra esaki tambe publicamente. Sinembargo partido MEP cu tin y semper lo keda cu un admiracion y stimacion enorme pa Betico Croes, na 2001 a rebiba e memoria di Betico Croes grandemente y bao di ex-Minister Ramon Lee a percura pa e memoria di e gran Arubiano aki no bay perdi nunca mas. Kende no ta corda tur e manifestacionnan protocolar y cultural riba Plaza Libertador Betico Croes cu a ser celebra en grande durante Gabinete Oduber III y IV? Kende no ta corda e

inauguracion impresionante di e estatua nobo di Betico Croes riba e Plaza cu awe ta carga su nomber?

Den pasado tambe partido MEP semper a duna reconocimiento na e gran Libertador Betico Croes y ta e partido aki cu a percura pa awe nos tin un Caya Gilberto Francois (Betico) Croes, Plaza Libertador Betico Croes na Playa, Plaza Status Aparte Betico Croes na Santa Cruz, Cede Libertador Betico Croes, e proclamacion di e dia oficial di natalico Betico Croes, esta 25 di januari, ponemento di busto di Betico Croes den Bestuurskantoor etc. Cu despues e gobierno di AVP no kier e busto aki y tambe a laga kita tur e potretnan di Betico Croes for di murayanan di Bestuurskantoor, esey no ta pa culpa di MEP. Alabes partido MEP sagradamente ta percura pa tur e fechanan cu ta relata na Betico Croes, manera entre otro Dia di Himno y Bandera, fundacion di su partido MEP

y Augustus Scur wordo recorda tur aña. Y pa no lubida con tur aña MEP ta percura pa Santo Sacrificio di misa y ofrenda floral na santana riba e fecha di fayecimento di Betico Croes. Si partido MEP y tambe Fundacion Betico Croes no haci tur esakinan, ta kende na Aruba lo mester haci esaki anto? Siguramente MEP no ta haci tur esakinan cu e intencion pa uza Betico of pronkea cu su plumanan, pero esaki ta bin for di curason di e hendenan di MEP mes, esta e MEP-istanan cu te ainda – despues di 25 aña – tin y lo keda cu un respet profundo pa e gran Arubiano aki y pa tur locual el a logra pa pais Aruba. E MEP-istanan aki siguramente lo no tolera, corda pa acepta cu otro politiconan opositor ta trata tur tur dia di kibra e memoria di Betico Croes, skirbiendo boekinan falso y falsificando completamente e historia di su lucha pa Status Aparte. Ta danki na e MEP-istanan aki te ainda esaki no a sos-

ode y lo no bay sosode den futuro tampoco!

Alavez mester trece bon cla padilanti cu na ningun momento so partido MEP mester uza Betico pa haya voto y un ehempel bibo tabata e eleccion di 2001 despues cu MEP tabata 7 aña den oposicion, caminda nos partido lidera pa nos gran lider sr. Nelson Oduber, cu MEP cu su propio programa di partido 'Ordo y Prosperidad', cu forza propio di tur e 29 candidatonan y cu su propio militancia a percura pa sacudi henter Reino Hulandes, ora cu MEP pa promer biaha desde Status Aparte a logra pone un record historico cu un victoria aplastante di 12 asiento y AVP cu solamente 6 asiento (12-6). Cuater aña despues, esta na 2005 MEP a bolbe pone un record historico den Reino Hulandes obteniendo un mayoria absoluto di 11 asiento. Pues riba su propio forza MEP a logra tur e victorianan aki y no a depende y ni a uza Betico Croes pa cu e logronan aki. Cu tin hopi votador leal cu ta stima Betico, cu semper a para tras di e idealnan di e gran lider aki y cu nan semper a vota pa MEP y cu nan lo sigui vota pa MEP ta un realidad cu ningun hende por kita for di nan, ni e yiunan di Betico.

Sinembargo partido MEP semper tin y lo keda cu un aprecio grandi pa e yiunan di Betico Croes y alavez ta keda agradecido cu nan a compartinan tata cu henter comunidad Arubano y ta pesey hamas y nunca nos lo permiti pa e lucha di Betico pa cu nos Status Aparte wordo falsifica. Y yiunan di Betico Croes lo por conta cu MEP den esey. □